

Su situacion ta hopi serio y a haya Santa Oleo

Inspector Eric Zaandam a haya atake cerebral den Warda di Polis



ORANJESTAD(AAN):
Tabata momentonan di panico ayeramainta laat na Warda di Polis bieu di Santa Cruz na unda cu ta otorga rijbewijs. Cu fila di hende para wardando pa por ricibi nan rijbewijs diripiente a cuminsa un gritamento den e lugar pasobra e conocido inspector di Polis, ex-Presidente di SPA Eric Zaandam a bira malo den su oficina.

Mesora su coleganan a pidi pa presencia urgente di un ambulance na e lugar y cu maximo urgencia a transporte pa Hospitaal.

Eynan dr. Falconi tabata sperando riba dje y a saca afor mesora cu el a caba di ricibi un atake cerebral y cu su situacion ta critico. A pase

mesora pa cuido intensivo na unda cu docternan tabatin speranza cu e sangramento lo stop pa nan por oper'e mesora.

Lamentablemente te den oranan di anochi e sangramento interno no a stop, cu consecuencia cu a opta pa dune Santa Oleo, cu e speranza cu Dios lo sa di inclui su mannan milagroso pa yuda Eric Zaandam cu a haye den un situacion asina den un forma diripiente.

DIARIO ta desea Eric Zaandam tur cos bon y cu nos bon Dios lo sa di drama su bendicion riba dje. Na su famia nos ta manda palabranan di forza y deseanan hopi fe, pa Eric por recupera liher pa pronto e por ta entre nos atrobe.